

PARKIELAND RIGLYNE VIR 2019

U word vriendelik versoek om hierdie riglyne te ondersteun:

1. TOELATING:

- Kleuters word eers toegelaat vanaf die jaar wat hulle 3 word.
- Die volgende dokumente saam met die Inskrywingsvorm is nodig vir toelating:
 - Kopieë van beide **biologiese ouers** se identiteitsdokumente.
 - Bewys van residensiële adres (Bv. Munisipale rekening).
 - Afskrif van leerder se onverkorte ("unabridged") Geboortesertifikaat.
 - Afskrif van kleuter se Immuniseringsertifikaat.

2. SKOOLTYE:

- Aankomstyd: vanaf **7:30 tot 8:30**
- Vertrektyd: vanaf **12:30 tot 13:30**
- Ouers wat nie by hierdie tye hou nie, werk steurend in op ons opvoedkundige program.
- Om ouers wat vroeg gaan werk tegemoet te kom, is daar vanaf **7:00** 'n onderwyseres aan diens.
- Die rooi appelmantjie wat aan die klas se naambord hang dui aan watter klas die vroeë klas is. Alle vroeë kleuters moet by die vroeë klas afgegee word. Geen kleuter/ouer mag in 'n ander klas wag vir hulle klasonderwyseres nie. Die 2 - 3 jariges word by hulle eie klas afgegee.
- Om 07:30 is al die onderwyseresse in hul klasse.
- Tussen 12:45 en 13:00 beweeg die Nasorgkleuters na ons eie Nasorgsentrum. Die 2 - 3 jariges bly in hulle eie klas.
- Teen 13:30 moet alle halfdagkleuters asseblief afgehaal wees.
- Vakansies stem ooreen met die van Gautengse skole.
- Vrydae sluit die skool om 13:00 vir die personeel. Alle halfdag kleuters wat nog nie afgehaal is nie, wag by die Naskool vir hulle ouers. Die 2 - 3 jariges kan in hulle eie klas afgehaal word.

3. SKOOLGELD:

- **Skoolgelde soos hieronder aangedui is vir 2019.**
- 'n **Registrasiefooie van R750** moet u kleuter se aansoekvorm vergesel. Hierdie fondse sluit 'n Parkieland T-hemp, 'n rugsak, 2 toegangskarte en kunsbenodigdhede in. (**Fooie is nie terugbetaalbaar nie.**)
- Die skoolfooie beloop **R26,785** (Halfdag-kleuters) en **R41,404** (Voldag-kleuters) per jaar en word vir u gerief in **11 paaiemente** verdeel, van Januarie tot November.
- **Die skoolfooie vir 2019: R2,435/maand: halfdagkleuters**
R3,764/maand: voldagkleuters
- **Betaaldatums:**
 - Fooie is streng vooruitbetaalbaar.
 - Voor of op die eerste werksdag van elke maand.
- **Wyses van betaling:**
 - Tjeks en Kontant:**
 - Tjeks moet uitgemaak word aan **Laerskool Menlopark**.
 - Kontant is vir ons onveilig om te hanteer.
 - Debietorders/Elektroniese betalings:**
 - Ons bankbesonderhede is: **Laerskool Menlopark, ABSA Takkode: 632 005, Tjekrekening, Rekeningnommer: 540 540 020**
 - Stuur die betalingsbewys na finansies@menlolaer.co.za
- **Agterstallige skoolgeld:**
 - Geen uitstel kan verleen word nie - indien u langer as 'n week agterstallig is, sal u versoek word om u kleuter by die huis te hou tot die volle bedrag vereffen is.
 - U kleuter se plek kan slegs vir 2 weke gehou word.
- **Verhuisings:**
 - Kleuters wat die skool verlaat se ouers moet asseblief **een kalendermaand skriftelik kennis gee**.
 - Onthou asseblief om u kleuter se kunswerke saam te neem.
- **Byhou van persoonlike besonderhede:**
 - Indien u adres, telefoonnommer of enige ander besonderhede verander moet u die Adminkantoor en onderwyseres dadelik in kennis stel.

4. PARKIELAND NASORGSENTRUM:

- Tye: Vanaf **12:45 - 17:30**.
- 'n **Aansoekvorm** moet voltooi word.

- Kleuters mag nie na 17:30 gehaal word nie - 'n boete van **R100** sal daagliks gehef word.
- **Middagetes** word voorsien aan die kleuters wat **voldag** ingeskryf is.
- Die vierjarige- en vyfjarige -kleuters rus vir 'n uur na middagete. Matrassies, kussings en komberse word deur die skool voorsien.
- Die 2 - 3 jariges ontvang toesig in hulle eie klas, en rus vanaf 12:00 tot 13:15. Alle beddegoed en matrassies word verskaf.
- Kleuters moet asseblief persoonlik by die nasorg-onderwyseres gehaal word.

5. AD HOC NASORG:

- Enige kleuter mag voldag bly mits reëlins vooraf met die klasonderwyseres en die kantoor getref word.
- Kleuters wat net af en toe kom, moet self vir middagete sorg - pak asseblief 'n **ekstra kosblik** in.
- Koste vir ad hoc nasorg beloop **R120 per middag** en 'n **aansoekvorm** moet voltooi word.

6. VAKANSIESORG:

- Vakansiesorg is beskikbaar vir **voldag-kleuters**.
- Uit ondervinding sien ons dat kleutertjies ook 'n breuk in hulle dag-tot-dag skoolroetine benodig.
- Tog is daar ouers vir wie dit nie moontlik is nie, en is u dan welkom om u kleuter vir vakansiesorg te registreer.
- U kleuter moet vir elke vakansie geregistreer word.
- 'n Registrasiefooi van **R200 per kleuter per week** sal gehef word.

7. TOEGANGSKAARTE:

- Kaarte wat aan ouers toegang tot ons terrein verleen word in die eerste week van skool in **Januarie** aan u beskikbaar gestel.
- Elke gesin ontvang twee toegangskaarte, wat befonds word uit die registrasiefooi wat u betaal het.
- Indien u u kaart verloor kan u 'n ekstra een aankoop teen **R100** per kaart.
- Indien u nie u kaart by u het as u u kleuter aflaai of afhaal nie, moet ons u versoek om by die Laerskool se voetgangerhek in te gaan.
- Rapporteer **verlore kaarte** asseblief dadelik by die kantoor aan.
- Omdat ons kleuters se veiligheid vir ons 'n groot prioriteit is versoek ons dat kaarte met groot verantwoordelikheid bewaar word en nie aan ongemagtigde persone beskikbaar gestel word nie, en dat alle ouers verantwoordelikheid moet neem om die toegangshek **toe te hou**.

8. BENODIGDHEDE:

- U kleuter het die volgende nodig:
 - 'n Kosblik **wat maklik deur u kleuter oop en toe gemaak kan word**.
 - 'n Toedruk-botteltjie met water of sap.
 - LET WEL: *Geen tasse - materiaal drasakke word verskaf.*
- 'n Ekstra stel klere vir **al** die vier- en vyfjariges.
- 2 Ekstra stelle klere vir die 2 - 3 jariges.
- Die 2 - 3 jariges moet asseblief 5 doeke per dag of onderbroekies tydens potty training per dag stuur, eie boudjiesalf, plastieksakkies vir doeke en wet-wipes, gemerk asseblief.

9. VERVERSINGSTYD:

- Slegs die 2 - 3 jariges ontvang 'n bordjie pap soggens vanaf 7:50 tot 8:10. Alle kleuters het 'n vroegoggend verversingstyd, en daarvoor moet u 'n kosblikkie inpak.
- Dis **nou** die beste tyd om gesonde eetgewoontes by u kleuter te vestig.
- Te veel suiker lei tot verhoogde suikervlakke en energievlakke en vermindering in konsentrasie.
- Stuur asseblief vir u kleuter 'n kosblik met **gesonde** eetgoed saam, 'n paar voorstelle:
 - 'n Vrug of gedroogte vrugte
 - 'n Toebroodjie, verkieslik bruinbrood
 - 'n Kaaswiggie, wortelrepies
 - Joghurt
 - 'n Dosie sap of gegeurde melk of toedruk-botteltjie met water of sap. (geen gaskoeldrank of energiedrankies nie)
 - **Geen lekkernye of soetgoed nie** (geen ontbytstafies, muffins, koekies bv. Marie, droëvrugte met suiker om nie), of skyfies nie.
- Die 2 - 3 jariges drink nie meer melk voor slapenstyd nie, en ons moedig ouers aan om slegs drinkbotteltjies en nie tietiebottels nie, skool toe te stuur.
- *Geen geld mag gestuur word sodat kleuters 'n broodjie by die snoepie kan gaan koop nie.* U sorg asseblief self dat u kleuter iets te ete saambring, of reël self met die snoepie om 'n broodjie te stuur.

- Lekkernye is slegs toelaatbaar met verjaarsdae. Daar moet vooraf met die klasonderwyseres gereël word.
- Meld asseblief alle allergieë aan.

10. KLERE EN VOORKOMS:

- Klere, skoene, koeldrankbotteltjies en kosblikke moet asseblief duidelik gemerk word.
- Trek gerus vir u kleuter ou klere aan, aangesien morsaktiwiteite belangrik is vir u kleuter se ontwikkeling.
- Kleuters word aangemoedig om kaalvoet te loop.
- Platvormskoene en **hoëhakskoene** word nie toegelaat nie, dit is baie onprakties en beperk die kleuter se bewegings-moontlikhede.
- Moedig u kleuter aan om altyd besittings in eie, persoonlike laai te bêre.
- Hou die "verlore klere"-rak dop.
- Ons vra baie mooi dat kleuters nie fantasieklere bv. Spiderman, ens. skool toe sal aantrek nie.
- Seuns se hare moet netjies wees, en geen "Mohawk" haarstyle nie, asseblief.
- Ons moedig dit aan dat kleuters op Vrydae hulle Parkieland t-hempies skool toe aantrek.
- **Geen bel-horlosies word toegelaat nie.**

11. SPEELGOED:

- Geen speelgoed mag saamgebring word nie. (Speelgoed raak weg, breek en veroorsaak onenigheid.)
- Indien van die skool se speelgoed by die huis aankom, stuur dit asseblief terug.

12. GESPECIALISEERDE AKTIWITEITE:

- **Gr 00 en Gr 000** kleuters kan uit die volgende **addisionele gespesialiseerde aktiwiteite** kies:
 - **Buite-speeltyd van 11:00 tot 12:00:** RDS Rugby, Playball, Gholf, Dans Muis, Pottebakkerie, Wetenskap, Tennis, Rekenaar en Judo
- Bogenoemde aktiwiteite word op vasgestelde dae by Parkieland aangebied.
- Maak seker dat u die **inskrywingsvorm** van elke aktiwiteit voltooi en voor Februarie ingee - maak asseblief van die **posbusse** in die kas langs die kombuis gebruik om met die afrigters te kommunikeer en u fooie te vereffen.
- U korrespondeer direk met die afrigters aangaande inskrywings en betalings - doen asseblief self kwaliteitskontrole, die afrigters sal u voorstelle waardeur.
- Verwittig asseblief u **klasonderwyseres** van die aktiwiteite waaraan u kleuter gaan deelneem.
- Stuur asseblief u kleuter se **sporttoerusting en -skoene** saam op die dag van die aktiwiteit en neem dit weer in die middag saam huis toe. Ons het ongelukkig nie spasie in die klasse om toerusting te bêre nie.
- Smeer asseblief soggens vir u kleuter **sonroom** aan, en stuur 'n **hoed** saam.

13. VERJAARSDAE:

- 'n Verjaarsdag is 'n groot gebeurtenis in die kleuter se lewe en daarom sal ons u kleuter op sy/haar verjaarsdag graag spesiaal wil laat voel. Verversings mag skool toe gestuur word, maar **geen** formele partytjies word in skooltyd by die skool gehou nie. **Geen** vermaak van enige aard word toegelaat nie, bv. springkastele, wateryglybane en narre.
- Bak-en-brou bestanddele is baie opvoedkundig en word sterk aanbeveel (reël asseblief vooraf met die klasonderwyseres om te hoor wat is aanvaarbaar).
- **Geen** ballonne, "sherbit", ysies of suigstokkies word toegelaat nie.
- Uitnodigings word slegs na huispartytjies uitgegee, nie vir die gewone klasvieringe nie.

14. KOMMUNIKASIE:

- Stel asseblief die klasonderwyseres in kennis van saamry-, afhaal- en sosiale-aktiwiteite van u kleuter.
- **Naskoolouers** moet van die boek voor die Admin kantoor gebruik maak sodat Nasorgpersoneel hulleself kan vergewis indien iemand anders u kind kom afhaal.
- **Nuusbriewe:** U sal elke Woensdag 'n nuusbrief ontvang, maak asseblief seker dat u kleuter dit neem. **Stuur asseblief die skeurstrokie Donderdag volledig ingevul in die nuusbrieffsakkie terug.**

15. GESUIWERDE WATER:

- Elke klas het 'n waterstaander wat gesuiwerde water vrylik beskikbaar stel aan ons kleuters.
- Vir hierdie diens vra ons 'n eenmalige bydrae van **R130**.

16. FOTOGRAFIE:

- Daar word deurentyd foto's van die kinders geneem soos hulle aan verskillende aktiwiteite deelneem. Die foto's word op die Parkieland webtuiste (www.parkieland.co.za) afgelaai, asook op facebook en flickr.
- Dra kennis hiervan en kom bespreek dit asseblief indien u ongemaklik is hiermee. Ons verseker u dat dit baie goed bestuur word.

- Ons kan soms van die foto's gebruik as advertensiemateriaal en/of vir publikasies in koerante of tydskrifte.

17. MEDIES:

- Kleuters met **aansteeklike siektes, wat koorsig is, diaree of naarheid ondervind of kopluipe het, mag nie skool bywoon nie.**
- Kleuters wat **antibiotika** gebruik moet vir **2 skooldae tuis bly.**
- **Alle medisyne** moet by die klasonderwyseres ingehandig word en in die **medisyneboek** aangeteken word, hoewel ons slegs medisyne in uitsonderlike gevalle wil ontvang vanweë die veiligheidsaspek met klein kindertjies, asook wetlike aspekte. Indien u wel medikasie skool toe moet stuur, moet u die korrekte hoeveelheid in 'n **inspuiting optrek en in 'n gemerkte plastiekbakkie plaas.** Geen bottels met medikasie mag ontvang word nie.
- Medikasie vir **allergiëe**, bv. bysteek moet deur u voorsien word. Dit mag in die kantoor toegesluit word.
- Om te verseker dat ons u in 'n noodgeval vinnig kan opspoor, moet alle **veranderings van huis-, sel- en werktelefoonnommers** so spoedig moontlik by die kantoor aangemeld word.
- Indien u kleuter **se klasonderwyseres afwesig** is, sal u kleuter by 'n ander klas kuier vir die dag - die **kuier-klaslys** sal op u kleuter se klasdeur aangebring wees, of 'n aflospersoneellid sal vir die tyd diens doen.
- **Die skool mag 'n mediese sertifikaat aanvra indien twyfel ontstaan rakende 'n kleuter se gesondheidstoestand.**

18. VERTREKTYD:

- Die taalperiode eindig eers om 12:30 vir die Gr 00 en Gr 000 kleuters.
- Ons versoek dat die kleuters afgehaal sal word vanaf **12:30**. Kom haal u kleuter asseblief so stil as moontlik.
- Die 2 - 3 jariges se slaaptyd en toiletroetine is eers om 13:15 afgehandel. U is welkom om dan u halfdag peuter tussen 13:15 en 13:30 te kry.
- Kleuters moet deur 'n volwasse persoon gehaal word, 'n kleuter sal **nie** aan 'n Laerskoolleerder oorhandig word **nie**.

19. KLASINDELING:

- Ouers moet asseblief nie versoeke rig nie - al die onderwyseresse is liefdevol en bekwaam en stel die kleuters se belange eerste.

20. PROBLEME:

- Ons sal alle probleme rakende u kind vertroulik en sensitief hanteer.
- Hou ons asseblief op hoogte van huislike en emosionele probleme.
- Bespreek probleme so gou moontlik met die klasonderwyseres en indien nodig met die hoof.
- Ons behou die reg voor om u te versoek dat u kleuter gehaal moet word indien hy/sy:
 - die klas ontstig,
 - ander kleuters afknou of
 - nie 'n skoon stel klere het as daar 'n "ongelukkie" gebeur nie of
 - siek of koorsig is.
- U is welkom om te kom gesels, maak asseblief net vooraf 'n afspraak, aangesien die Hoof ook 'n klas behartig.

Parkielandgroete,

RIEKIE VAN EEDEN
SKOOLHOOF

----- skeurstrokie -----
PARKIELAND RIGLYNE 2019

EK OUER/VOOG _____ VAN _____
(Kleuter se naam)

KLAS _____ AANVAAR HIERMEE ONGEKWALIFISEERD EN ONVOORWAARDELIK DIE RIGLYNE EN VOORWAARDES VAN PARKIELAND EN DAT EK AS OUER/VOOG KENNIS DRA VAN DIE INHOUD.

EK, VERLEEN TOESTEMMING DAT MY KIND SE FOTO OP DIE WEBTUISTE/FACEBOOK/ANDER VORMS VAN MEDIA GEPLAAS MAG WORD.

JA / NEE

HANDTEKENING _____

DATUM _____